

Caso di abuso sexual contra mucha handicap a bolbe wordo posponi

ORANJESTAD – E caso penal contra e homber H. (67) atrobe no a sigui. Esaki pa motibo cu e rapport medico cu e abogado mr. Crouch a exigí, ainda no a keda cla.

ABUSO DI MUCHA HANDICAP

E acusacion contra H. ta lo a haci abuso sexual cu un mucha muhe handicap den e periodo di 6 Juli 2011 pa 24 Februari 2013. Abogado mr. Crouch a bisa Hues cu el a manda diferente carta na tanto Hues Comisario como Ministerio Publico pa pidi pa haci mas investigacion door cu e sospechoso lo tin problema pa tene relacion sexual. E abogado mr. Crouch a bisa Hues cu el a manda carta pa laga un ginecologo haci mas investigacion pero no a tende nada di esaki. Fiscal a bisa cu e no sa di nada. Abogado a mustra Hues e faxnan cu a wordo manda y Hues ta dispone di esakinan. Mr. Crouch a bisa Hues cu e ta haya cu esaki ta sumamente importante pa determina si e sospechoso por a comete e delito cu e ta wordo acusa di dje. E abogado a bisa Hues cu e señora di e sospechoso a papia cu Hues Comisario y a splica e problema di e sospechoso. Ta asina cu e intencion tabata cu lo trata e caso diabierna ultimo. Sinembargo a resulta cu ainda e rapport medico no ta cla. Esey a haci cu mester a bolbe pospone e caso.

Manera ariba ya menciona, e abogado mr. Crouch ta haya sumamente importante e rapport medico ya cu esaki ta determinante pa cu e caso penal.

Mirando e importancia di e rapport aki, Hues a bisa cu no ta keda nada otro cu pospone e caso. Despues di a averigua den e agenda di casonan penal, a stipula pa sigui cu e caso dia 29 November pa 9.30 di mainta.

Anterior abogado mr. Crouch a pidi pa laga e sospechoso liber y esaki a wordo rechasa. Hues e biaha aki a bisa cu e sospechoso ta keda encarcela te dia di e caso.

